

Pelajar KUTKM bantah kekejaman Israel

Archival News | Utusan Malaysia | 12/08/2006

MELAKA 11 Ogos - Para pelajar Kolej Universiti Teknikal Kebangsaan Malaysia (KUTKM) mengadakan perhimpunan di kawasan kampus universiti itu di sini hari ini bagi menyatakan bantahan terhadap kekejaman Israel ke atas rakyat Lebanon dan Palestin.

Perhimpunan bantahan yang pertama kali diadakan itu dianjurkan oleh Majlis Perwakilan Pelajar (MPP) serta Persatuan dan Kelab Mahasiswa KUTKM.

Yang Dipertua MPP KUTKM, Raja Nor Azrin Raja Yunus berkata, bantahan tersebut merupakan luahan rasa tidak puas hati para pelajar universiti berhubung kekejaman regim Israel yang telah membunuh ramai orang awam.

"Mahasiswa KUTKM sama sekali tidak bersetuju dengan serangan yang dilakukan oleh negara tersebut ke atas rakyat Lebanon dan Palestin," katanya ketika ditemui di sini hari ini.

Beliau berkata, sebagai menyatakan keprihatian pelajar KUTKM terhadap nasib malang rakyat Lebanon dan Palestin, MPP KUTKM mengadakan kutipan derma melalui Tabung Bantuan Asia Barat bagi membantu mereka.

Memorandum

Selain itu, pelajar KUTKM juga menandatangani memorandum membantah serangan Israel dan ia akan diserahkan kepada Menteri Pengajian Tinggi, Datuk Mustapa Mohamed pada 17 Ogos ini.

(Source : Utusan Malaysia)